

Ing. Alonso (Ali) Tromp di PDR:

Duna Cesar loke ta di Cesar



ORANJESTAD (AAN) -- Mi por a ripara tanto den partido Berde como den partido Geel ta pleitando y ta pretende cu ta nan ta bai habri e Refineria bek. Mi kier a recorda nan cu danki na e esfuerso di mr. Andin Cesar Giovanni Bikker, Lider di PDR, riba su Mocion cu e la presenta den parlamento cu a wordu Aprobá Unanimamente, esta e Mosion pa STOP e Desmantelacion di e Refineria di biaha (per direct) y pa Gobierno instala un Comicion pa bai sigui negocia pa un Re-apertura di e Refineria.

Na mei 2015 riba esfuerso di señor Bikker cu ta presidente di e Comicion di Companianan Estatal, a invita e ehecutivo/experto den Refineria (ex Coastal Aruba) señor Nelson English den Parlamento di Aruba unda cu señor English a expresa su mes cu tin espacio suficiente pa un Re-apertura di nos Refineria na Aruba, pero cu Gobierno di Aruba mester

hasi tur Intento y Esfuerso pa por habriele.

Tambe Andin Bikker tabata invitado di e grupo "PARA" y e.o. San Nicolas Business Association na un "Town Hall Meeting na YMCA San Nicolas" pa splica y trese claridad pa e Pueblo di Aruba, unda cu e Pueblo mes por a tende y hasi tur pregunta na e Panelistanan presente. E publico cu a bini, a keda super contento pa por a hanja sa e berdad kico tawata pasando, unda cu e Pueblo di Aruba NO por wordu engaña mas of atrobe pa Gobierno di Mike Eman II.

Ta bon pa e Pueblo recorda e palabra nan di Minister Mike De Meza, unda cu e ta bisa Enfaticamente cu ta bon pa tur hende realiza cu un Refineria NO ta manera un Supermercado of Shop, pero ta rekeri hopi Invercion di Capital pa habriele bek. Mester inverti mas cu 500 Milyon Dollar. Pa por hasi

e Planta mas Competitivo riba Mercado Internacional, mester un Invercion di algun Bilyon Dollar y tambe cu e Refineria mester tin su propio y/of acceso na Crudo/Petrolio. Segun Minister Mike De Meza hamas por hanja un Compania asina unda cu lo ta mihor pa Desmantela e Refineria y bendele pa Hero Bieuw cu su amigonan y pa asina Gobierno tambe por hanja e terenonan cu ta bira liber pa duna Gobierno su Real Estate pa por bendenan. Tambe nos tur por corda con Prome Minister señor Mike Eman saliendo pa Hulanda, pa bai busca sosten na Hulanda riba e Refineria. E la declara na Aeropuerto cu e tin un DILEMA pa habrimiento di e Refineria, cu otro palabra e tin un DILEMA y NO cualkier tipo di DILEMA sinó un "DILEMA INMENSO pa habri e Refineria of pa escohe pa un Desaroyo Duradero pa San Nicolas". Pueblo por ripara con asina hopi Amor e tin pa e Pueblo di San Nicolaas.

Nos mester keda conciente cu, Ora bo perde 15% di bo Entrada Bruto di bo Pais y bo Economia ta varia, ta logico cu bo mester evalua pa bai den direccion di Re-apertura di nos Refineria bek. Nos ta compronde cu tin hende cu opinion diferente (y esey ta sano den un pais liber) cu kier mira otro desaroyo pa cu e refineria y nos tin respet pa na opinion, pero actualmente macro-economicamente nos Pais Aruba no tin otro opcion cu opta pa Re-apertura.

Mi kier a termina recordando dos dicho: 1. Ora cu bo hanja cos di come, bo NO mester lubida ta kende a dunabo di come y 2. duna Cesar loke ta di Cesar.